

Kontuola

ANTZUOLA / Egubakoitza / 2002ko maiatzaren 31 / 115. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com

Eskola Kiroleko Kontseilua eratu dute eskolak, gurasoek eta Udalak

AINTZANE IRIZAR

Pausoka Gurasoen Elkarteko hainbat kidek, herri ikastetxe-ko irakasleek eta Udaleko kirol arduradunek osatu dute Eskola Kiroleko Kontseilua deitu diotena. Euren helburua da eskola orduetatik kanpo neska-mutikoek egiten duten kirola bultzatu eta antolatzea.

Eskola kirolean herri bakoitzak bere antolaketa sistema propioa dauka. Antzuolaren kasuan, beti funtzionatu izan du antzera samar: gurasoak izan dira beti eskola orduetatik kanporako kirol jarduera horien oinarria. Eurak dira herriko neska-mutikoak entrenatzeaz arduratzen direnak, astero Bergaran jokatzen dituzten partiduetara eramaten dituztenak eta, oro har, ardura handien hartzen dutenak. Bestalde, Herri Ikastetxeko Kirol Heziketako arduradun Jose Angel Amasorrainen laguntza izan dute beti.

Antzuolako Udalean duela gutxira arte kirol teknikaririk egon ez denez, eskola kiroleko antolaketaren zati handi bat herri ikastetxeak hartu izan du bere



Entrenamendu saio gehientsuenak eskolako jolaslekuan egiten dituzte.

JOSE ANGEL AMASORRAIN

gain, eta ez Udalak, beste hainbat herritan moduan.

Orain, baina, hiru partaide izango ditu, esan bezala, sortu berri duten kontseiluak: Udale-

ko kirol teknikaria, gurasoak eta koordinatzaile lanak egingo dituen Jose Angel Amasorrain ikastetxeko irakaslea. Funtsean, dena dela, berdin funtzionatuko

du. Kontua da Udalak hainbat baliabide jarriko dizkiela eskura neska-mutiko, entrenatzaile eta gurasoei. Hasiara baten, gurasoek jarraituko dute entrenatzaile.


HERRITARRENHITZA / Joseba Lezeta • Kazetaria

Oinak lurrean

Oinak izarretan saioaren programa berezia eskaini zuen Euskal Telebistako lehen kateak joan zen asteko zapatuan, maiatzaren 25ean. Alberto Inurrategi, Jon Beloki, Jon Lazkano eta Juanjo San Sebastian aritu ziren hizketan Asier Aranguren kazetariarekin Annapurnako igoeraz. Saio berezi hori ia bukatzeaz zegoela Inurrategirekin tontorrera igo zen Lafaille mendizale frantziarrak badaezpada eramanean zuten injekzioaz galdetu zion Arangurenekin Inurrategiri. Mendizale atxabaltarrak egoera

larrian hartu beharrezko "txutea" aipatu zuen. Berak inoiz ez omen du horrelakorik eramane orain arte, baina aurrerantzean eramateko asmoa azaldu zuen. Hil edo biziko egoeran, bizirik jarraitzeko bidea izan daiteke era horretako injekzioa.

Dopinga etorri zitzaidan burura. "Txute" hori hartuz gero, positiboa izango litzateke ala ez? Kirolari bezala bai,



"Oraingo mendizaleak mendian egindako lanetik bizi dira"

mentsatu nuen nire artean. Pertsona bezala, bizirik segitzeko lagungarria bada, hartzeko gomendatuko nioke edozeini. Lafaille tontorretik beherakoan egon omen zen hartzeko zorian. Baina norbaitek hartuko al du era horretako laguntza bat igotzeko? Nik ez

nuke ezetzik esango; are gehiago, himalaismoak hartu duen bidea ikusirik: ea nork

zortzimilako guztiak egin, ea bide zailena non aurkitu... Kirol honek, elite mailan gutxienez, erromantizismoa galdu du, nahiz eta ikusgarritasuna irabazi. Tximist espedizioan joan ziren mendizaleak baino askoz hobeto prestatuta daude egungo mendizale hauek. Baina haien helburu bakarra tontorrera igotzea zen. Oraingo hauek, aldiz, mendian egiten duten lanetik bizi dira, eta beste gauza batzuk pasatuko zaizkie burutik erabakiak hartzeko orduan. Izarretan baino gehiago, lurrean behar dira oinak.

LABUR

Urkulutik ura ekartzeko lanekin hasi berri dira

Astelehenean hasi ziren Urkulutik Antzuolara ura ekartzeko lanekin. Ibarreko gainerako herrietan Urkuluko ura hartzen dute herritarrek; lan horiekin bukatzen dutenean, antzuolarrek ere Aretxabaletako urtegiko ura hartuko dute etxeetan.

Egingo duten sarearen bitartez, herriko ur biltegirira, Aitzagako biltegirira, iritsiko da ura, eta handik banatuko da Antzuolako etxe guztiara. Lau tokitan hasi dira lanekin dagoeneko.

Elay lantegian lapurretan egin zuten asteburuan

Zapatutik domekarako gauean, lapurrak sartu ziren Elayk Lizarragako hiribidean duen lantegian. Lantegira sartu baino lehen, alarmak apurto eta telefono-linea moztu zuten.

Lantegiko arduradunek KONTUOLARI adierazi diotenez, badirudi diru bila joan zirela, baina lantegian ez dute dirurik edukitzen.

Bi hilabeteren barruan, lapurreta bat baino gehiago gertatu da herrian; duela hilabete, esate baterako, Itzar liburu dendan egin zuten.

Zabor edukiontziaak husteko, arazoak izaten dituzte

Duela hilabete batzuk, Debagoienerako Mankomunitateak hartu zuen herriko zabor edukiontzien ardura. Zaborra jasotzeko egunak ere aldatu zituzten: astelehen, eguazten eta egubakoitzetan jasotzen dituzte zaborrak Antzuolan.

Beheko auzoan arazoak izan ohi dituzte zabor biltzaileek. Izan ere, alboan autoren bat badago, ezin izaten dute edukiontzia hustu. Hortaz, edukiontzia ondoan autotik ez aparkatzea eskatzen dute Udaleko arduradunek.

ELKARRIZKETA

JOSE MARI ITURBE/BAKE KONFERENTZIAREN ALDEKO TALDEKO KIDEA

“Elkarrik ez dauka bakearen giltza, baina ahalegina egiten dihardu”

A.I.

Bihar, zapatua, kale bilkura isila deitu du Bake Konferentziaren aldeko Antzuolako taldeak, arratsaldeko zazpitan. Talde horretako kide Jose Mari Iturberekin egon gara, Bake Konferentziaz berba egiteko.

Zapatuan, kale bilkura egingo duzue. Zein helbururekin?

Bake Konferentziaren mezu berberarekin, alde batetik, konferentzia hori bultzatzeko. Bestetik, Batasunaren ilegalizazioaren aurka azaldu nahi dugu.

Zela doa Bake Konferentzia?

Elkarrik balorazio positiboa egiten du. Gainera, nik uste dut baikorrak izan behar gara; eze-tza oso merkea da. Nik uste dut azkenean lortuko dugula bakea, ez dakit nola eta noiz, baina lortuko dugu. Elkarrik ez dauka bakearen giltza, ez dauka egoera honi konponbidea emateko giltza. Baina ahalegin bat egiten ari da, behinik behin.

Hasiera baten, martxoan bukatzekoa zen Bake Konferentzia, baina luzatzea pentsatu zuten. Zergatik?

Lehenengo, martxotik ekainera atzeratu zen, PSE-EEK horrelaxe eskatuta, euren kongresua zela-eta. Horrelako prozesu baten oinarria da denok parte hartzea, bestela konponbiderik lortzea oso gaitza ikusten da. Orain, prozesua berez bukatzeaz dago, baina Batasunaren ilegalizazioaren kontu hori dela-eta, berriro urri-arte luzatzea erabaki dute. **San Isidroko azokan mahai informatiboa jarri zuten. Zelako erantzuna izan zuten?**

Jendea ibili zen eta atxikimendu batzuk jaso genituen. Baina, egia esan, beti antzerako jendea hurbiltzen da. Dena dela, Bake Konferentzia hasi aurretik, ehunetik gora atxikimendu eta ekarpen lortu genituen herrian.



AINTZANE IRIZAR

“Ilegalizazioaren aurka eta Bake Konferentziaren alde egingo dugu kale bilkura”

Berdintasuna eta denon partehartzea ei dira bakearen oinarriak. Zer egin dezake edozein herritarrek?

Luzera begirako helburuak izan behar ditugu. Agintzen duenak errepresio gogorra erakusten du. Botoa duenak agintzen du;

“Bake Konferentzia hasi aurretik, ehunetik gora atxikimendu lortu genuen herrian”

horrek ez du esan nahi besteen eskubideak zapaltzeko eskubidea duenik. Pentsatzen jarriko bagina nik egiten dudanak zer nolako eragina daukan bestearengan, gauzak aldatuko lirateke. Bestearen larruan sartzeak asko laguntzen du.



Eskolako kirolariak bikain ibili dira

Maiatzaren 16an jokatu zituzten eskola kiroleko finalak Bergaran. Lau final irabazi zituzten antzuolarrek. Benjaminek saskibaloiko eta futboleko finalak irabazi zituzten. Alebinek, berriz, bai neskek eta bai mutilek, saskibaloiko txapelketa irabazi zuten. Bestetik, gimnasia erritmikoan ere emaitza onak izan dituzte antzuolarrek: kadeteak Gipuzkoako txapelkunak izan dira taldeka eta alebinak bigarren geratu ziren; Uxue Arregi kadetea, azkenik, banakako txapelketa izan zen./A.I.

KIROLA

Kadete eta gazteek ere bukatu dute futbol denboraldia

Joan zen asteburuan jokatu zituzten kadete eta gazte mailako futbol taldeek denboraldiko azken partidua. Kaskar samar amaitu dute denboraldia, biek galdu egin zuten-eta.

Kadeteek 12-3 galdu zuten Beraun taldearen aurka. Hala ere, oro har, nahiko denboraldi ona egin dute. Igoera fasea jokatu dute, nahiz eta azkenean zortzigarren postuan sailkatu diren, 11 punturekin, liderrak baino 33 gutxiagorekin.

Gazteek ere galdu egin zuten azkeneko partidua, 1-2, Ikasberri taldearen aurka. Gazteek ez dute hain denboraldi ona egin, eta euren taldeko azkeneko tokian bukatu dute aurtengo denboraldia, 17 punturekin; Amaiak Bat liderrak 90 puntu ditu.

Zumaiatik Getariara oinez joateko irteera antolatu du Arrolak

Gaztetxoendako antolatu dute, eta ekainaren 9an izango da. 09:00etan irtengo dira plazatik, eta ibilbidearen ostean, hondartzara joango dira. Ekainaren 4an, martitzenean, 19:00etatik 20:00etara eman behar da izena.

Bizikleta probak antolatu ditu Peña Aiastuik ekainerako

Ekainaren 8an, zapatuan, 12:00etan, Iralara igoera egingo dute. 16:00etan, berriz, ginkana jokoak izango dituzte Zurrategin. Ekainaren 15ean, Uzarragarako igoera jokatu dute; 22an, ginkana jokoak egingo dituzte, eta 30ean, San Martzialerako igoera.

LARREA
TABERNA
Kalebarren 17
ANTZUOLA

Igor eta Txomin

Margoak orokorrean
ANTZUOLA 609 157 131
BERGARA 609 150 164

Tomas Gezalaza
Apainketarako eta industriarako pinturak
Paper margotuak
Moketak eta tapizatuak
Kalegoi 21
Tf. eta faxa 943 76 64 07
Poltsikokoa 616 277 999
ANTZUOLA / BERGARA

GAILUR
taberna eta gozotegia

Buztinzuri 13 ANTZUOLA
Tf. 943 78 70 32

Tomas Gezalaza
Zoruen kutxilatua eta barnizaketa
Kalegoi 21
Tf. eta faxa 943 76 64 07
Poltsikokoa 616 277 999
ANTZUOLA / BERGARA